

# ISRAEL



Eben-ha-Ezer Toer

*B* **Bybel Toere**

**Julie 2023**

Toerprogram

[www.bible-tours.co.za](http://www.bible-tours.co.za) / [book@bible-tours.co.za](mailto:book@bible-tours.co.za)

073 11 7447 0

10

Dag Toer

**Junie / Julie 2023**

9 vol Dae / 10 Nagte (-2)

**Platinum**

\$1 = R14.50 – R41 800

\$1 = R15.50 – **R42 500**

\$1 = R16.50 – R44 100  
(Beraming)

## Deel in 'n Belewenis

*Ingesluit:*

*Retoervlugte vanaf O.R. Tambo Lughawe*

*Luukse Hotel Verblyf*

*Ontbyt en Aandete*

*Vervoer na besienswaardighede*

*Mediese versekering*

*Voorwaardes: Per persoon wat deel*

*Minstens 32 toerlede*

*Prys onderhewig aan verandering*



### Dag 1 |

#### JOHANNESBURG – TEL AVIV

Groot opgewondenheid! Ons ontmoet mekaar D.V. 4 ure voor vertrek by O.R Tambo Internasionale Lughawe. Nadat die formaliteite afgehandel is, geniet ons saam koffie op eie bodem en gaan aanboord die vliegtuig vir 'n oornagvlug na Tel-Aviv.

### TEL AVIV – BEERSHEBA – MASADA - DOOIE SEE

Ons arriveer in die oggend op die Ben Gurion Lughawe, en gee ons eerste voetstap in die heilige land. Vandaar gaan ons met 'n luukse toerbus na Beersheba, die stad van die Stamvaders, in die gebied van die Negev-woestyn. Dan verder na Masada, waar ons per kabelkoets na die bo-punt van die berg gaan om die bouvalle van 'n Joodse vesting te besigtig. Hierdie is ook die omgewing waar Dawid as jong seun rondbeweeg het.

Ons reis voort na Ein-Bokek by die Dooie See, die laagste punt op aarde. Ons gaan tuis in die luukse David Hotel & Spa. Na 'n ruskans geniet ons 'n heerlike aandete en sal dan na sons-onder die geleentheid hê om in die Dooie See te swem, of "te dryf". 'n Wonderlike ervaring.

### EIN GEDI – QUMRAN – BETHABARA – JERIGO – TIBERIAS

Vanoggend vertrek ons na Ein Gedi, en besigtig die grotte waar Dawid en sy manne weggekruip het vir Koning Saul. Ons reis verder na Qumran waar die Dooie See boekrolle ontdek is. Van hier is 'n uitsig na die oostekant van die Jordaan, met die berg Nebo op die horison. Daarna besoek ons Bethabara, waar Johannes die Doper vir Jesus gedoop het in die Jordaanrivier. Dit is ook die omgewing van ander belangrike gebeurtenisse in die Bybel. Verder na Jerigo, een van die oudste stede op aarde, met oorblyfsels van die stadsmuur wat op God se bevel getuimel het. Ons sien ook 'n vyeboom, soortgelyk aan die een waarin Saggues geklim het, toe Jesus daar verby gegaan het. Ons reis dan verder noordwaarts langs die Jordaan-rivier, verby Gilgal en Bet Shean, na ons hotel in Tiberias. Die hotel is geleë op die oewer van die See van Galilea.

**BOOTRIT - BO-GALILEA - CEASARIA PHILIPPI - DAN - BETSAIDA**

Na ontbyt by die Ron Beach, onderneem ons 'n bootrit op die See van Galilea, 'n wonderlike ervaring. Ons ry daarna verder per bus na Bo-Galilea en reis deur die gebied waar Josua die noordelike konings deur God se hand verslaan het. Die oorblyfsels van die stad Dan, is 'n besienswaardigheid op ons roete. Daarna vertoef ons by die oorsprong van die Jordaan waar Jesus by geleentheid sy evangelie verkondig het.



**MAGDALA - KANA - NASARET - TABOR**

Na 'n heerlike ontbyt, besoek ons Magdala, waar onlangs 'n pragtige sentrum opgerig is by die oorblyfsels van die eertydse dorp waarin Maria Magdalena gewoon het. Ons reis dan in die rigting van onder-Galilea en doen eerste aan in Kana, waar Jesus die water in wyn verander het. Dan voort na Nasaret, en ons besoek die Kerk van Aankondiging, asook "Josef se Grot", wat as timmermanswinkel gedien het. Die dag word afgesluit met 'n besoek aan die berg Tabor, waar die "verheerliking" plaasgevind het.

Dag 6 |

GALILEA -TABGHA - KAPERNAUM - BERG VAN SALIGSPREKINGE - MENSA CHRISTI

Vandag besoek ons die gebied waar Jesus en sy dissipels baie vertoef het. Ons eerste stop vir die dag is by die Berg van Saligsprekinge, waar ook die bergpredikasie deur Jesus gelewer is. Dan Tabgha, waar die wonderwerk met die brode en visse plaasgevind het. U sien ook 'n oliepers wat goed behoue gebly het. Ons besoek hierna die dorpie Kapernaum en sien die oorblyfsels van die 2de eeuse sinagoge, gebou op die plek soos dié wat in die tyd van Jesus daar was. Ons gaan laatmiddag na Mensa Christi, waar Jesus aan sy dissipels verskyn het by die See van Galilea. Die groep vertoef hier lank genoeg sodat almal die geleentheid kry om sommer net op die strand te sit, of selfs in die vlakwater te staan en die brandertjies te beleef soos in die tyd van Jesus. 'n Baie besondere plek om te wees!

Na aandete onderneem ons 'n opsionele bootreis op die See van Galilea, wat grootliks die gevoel gee van die geleentheid toe die storm oor die skuit van die dissipels gekom het.



Dag 7 |

KARMEL - CAESAREA - EIN KAREM - JERUSALEM

Ons verlaat Galilea en reis in die rigting van die Middelandse

see, na die berg Karmel. Dan met die kus af na Caesarea, eers besoek ons die "Aqueduct" en daarna die gerestoureerde Romeinse Amfiteater. Caesarea is ook die plek waar Petrus die Romeinse offisier gedoop het en eintlik daarmee die begin van die Kerk van Christus, ook vir ander nasies aangekondig het. Paulus het ook sy reise hiervandaan onderneem. Ons gaan dan binnelands en doen aan by Ein Karem, die tuiste van Johannes die Doper. Die laaste rit vir die dag is na die hotel in Jerusalem vir aandete en 'n heerlike nagrus.

## Dag 8 |

### OLYFBERG – GETSÉMANÉ – BETLEHEM – HERDERSVELDE

Vanoggend besoek ons die Olyfberg met 'n pragtige uitsig oor Jerusalem. Ons besoek eerste die Hemelvaartskapel, dan stap ons die berg af en stop by die plek waar Jesus oor die stad geween het. Verder gaan ons na die Tuin van Getsémané, die plek van Jesus se worsteling en gevangeneeming. Ons spandeer tyd in die "Kerk van Angs", 'n spesiale plek om te wees. Ons gaan per bus verder na Bethlehem en besoek die geboorteplek van Jesus, een van die belangrikste plekke op aarde. Ons sluit die dag af by die Herdersvelde waar die Engele aan die herders verskyn het.


## Dag 9 |

### JERUSALEM (OU-STAD) – BERG SION – TUINGRAF

Vandag begin ons by die Mispoort van die Ou Stad en stap na die Klagmuur, die heiligste plek vir die Jode. Ons besoek 'n ondergrondse sentrum waar dele van die Tempelmuur en eersydse stadstrukture oopgegrou is. Ons besoek die Bad van Betesda, en die St. Anne's Kerk, gebou op die plek waar moeder Maria gebore is. Dan na die paleis van Pontius Pilatus en ook die Vesting van Veroordeling waar Jesus die kruis opgeneem het. Ons volg die Via Dolorosa na die tradisionele

Golgota en sien die kapel wat opgerig is oor die plek waar die kruisiging plaasgevind het. Hierna gaan ons na die berg Sion, en besoek die Bo-vertrek. Ons stap dan verder na die Kerk van St. Peter in Galicantu, ook bekend as die Huis van Kajafas, waar Jesus aangehou was en ook waar Petrus vir Jesus verloën het.

Die dag word afgesluit met 'n besoek aan die Tuingraf, waar ons nagmaal gebruik. Een van die hoogtepunte van u toer!



## Dag 10 |

### ISRAEL MUSEUM – SIGEM – SILO – JOPPE – TEL AVIV

Ons besoek vandag die Israel Museum. Hier word die Dooie See boekrolle ten toon gestel, en ook 'n merkwaardige model van die oustad, Jerusalem. Ons verlaat Jerusalem en indien omstandighede dit toelaat, reis ons na Sigem, waar die put van Jakob is, en ook Silo, waar die Ark van God vir baie jare gehuisves was.

Ons laaste besoekpunt van die toer is Joppe, volgens oorlewering die oudste hawestad ter wêreld. Ook die eertydse woning van Simon die Leerlooier en die plek waar Petrus vir Dorkas (Tabitha) uit die dood opgewek het. Ons reis dan na die Ben Gurion lughawe vir ons vlug na Suid-Afrika.

Ons behoort vroeg oggend in Johannesburg neer te stryk. Hierna groet ons mekaar as toervriende met mooi herinneringe van die plekke waar Jesus en ander Bybel-figure ons vooruit gegaan het, en ook met 'n beter begrip van die wêreld van daardie tyd.



